

Powšitkowne WOZJEWJENJA

njedźelu, 29. januara 2023

Wusyłanje Božej mše

Serbskorěčnu Božu mšu móža wěriwi tutu njedźelu, 29. januara, w 9 hodź. znova jako livestream z Chrósćić scěhować. Link na nju je w interneće pod www.posol.de kaž tež na wosadnej stronje podaty.

Modlenje w Róžeńće

Na modlenje swjateho różowca a před Najswjećišim su wěriwi sobotu, 4. februara, we 18 hodź. do Róžeńčanskeje hnadowneje cyrkwy přeprošeni. Pačerje budu serbsce a němsce spěwane.

Boža mša w Radworju a Drježdźanach

Na Božu mšu na wopomnjenskim dnju a 80. posmjertninach zbóžneho martrarja Alojsa Andrickeho su wěriwi pjatk, 3. februara, we 18.30 hodź. do Radworja přeprošeni. Předar budže farar dr. Bernhard Dittrich ze Smochćic a nic benediktinski pater Joachim Wernersbach z Kulowa. Wón poda so na operaciju. Božu mšu wuhotuja chór Bratrowstwa a dujerjo. Samsny dzeń su hižo we 18 hodź. pontifikalne kemše w Drježdźanskej katedrali, kotrež swjeći biskop Heinrich Timmerevers. Kapałnicy, kotrychž prefekt kapłan Alojs Andricki swój čas bě, kemše hudźbnje wuhotuja. Tutu Božu mšu přenjesu w interneće jako livestream. Link na nju je pod www.posol.de podaty.

Zhromadny dzeń za 1. a 2. lětnik

Pod hesłom „Pój, wjesel so!“ přeprošuje Dekanatne dušepastyrstwo za džěci šulerjow 1. a 2. lětnika na zhromadny dzeń do Don Boskowneho domu we Worklecach, kotryž wotměje so wutoru, 14. februara, wot 9 do 15 hodź. Zajimcy měli so hač do njedźele, 5. februara, online přizjewić. Link k tomu je pod www.posol.de wozjewjeny. Za wudawki dnja zběraja wot kóždoho wobdźělnika přinošk pjeć eurow.

Serbske kemše w Drježdźanach

Drježdźanscy Serbja su na maćernorěčnu Božu mšu njedźelu, 12. februara, w 16 hodź. do cyrkwy swjateho Antonija na Bünauskej 10 přeprošeni. Kemše swjeći farar Gabriš Nawka. Přizamknje so bjesada.

Film „GOTT“ a rozmołwa z fachowcami

Štó rozsudži wo smjerći čłowjeka? Tele prašenje steji w srjedźišću popupoweje inscenacije „GOTT“ bestsellerowneho awtora Ferdinanda von Schiracha, kotraž zaběra so z asistěrowacym suicidom. Na iniciativu Katolskeje akademije Drježdźansko-Mišnjanskeho biskopstwa a Sakskeje krajneje centrale za politiske kubłanje předstaja Würzburgske dźiwadlo Chambinzky kruch tež w Sakskej. Předstajenja su mjez druhim planowane srjedu, 1. februara, we 18 hodź. w katedralnym forumje w Drježdźanach a štwórtk, 2. februara, w 17.30 hodź. we Łutowskej kulturnej cyrkwi. Po tym scěhuje na jewišću stajnje rozmołwa režisera Kaija Christiana Moritza z ekspertkami a fachowcami z wobłukow paliatiwneje mediciny, hojenja, teologije a etiki. Link k nadrobnym informacijam, tež za předstajeni w Lipsku a Kamjenicy, je pod www.posol.de podaty.

Na digitalne wodženje

Dom Měrcina Nowaka Njehorńskeho móža zajimcy wotnětka tež digitalnje dožiwić. Wodženje nasta na nastork Budyskeje župy „Jan Arnošt Smoler“. Michał Cyž běše je z Róžu-Marju Kurfürstec-Pinkawinej natočil, jednotliwe zwukowe dataje přitřihaj a wobrazam přirjadował. Tak zhonja zajimcy zajimawostki ze žiwjenja a skutkowanja wuměłca, ale tež wo přecelstwje wodžerki z nim. Link k digitalnemu wodženju je pod www.posol.de wozjewjeny.

Chorych a mrějacych přewodźeć nawuknyć

Ambulantna hospicna služba Hornjołužiskeho zwjazka Carity z.t. w Kamjencu poskićuje lětsa zaso kurs k čestnohamtskemu přewodženju ćežkochorych a mrějacych. K tomu trěbnu wědu posrědkuje w zakładnym kursu, kotryž wotměje so wot 1. měrca hač do 1. apryla trójce srjedu wot 17 do 20 hodž. a trójce soboty wot 9 do 15 hodž. Na to scěhuje dohromady 40hodžinski praktikum z dalšimi štyrjomi zetkanjemi. Pohłubšacy kurs je w septembru planowany. Štóž chcył wukubłanje absolwować, měł so pola hospicneje služby Carity w Kamjencu pod telefonowym čislom (0 35 78) 37 43 12 abo z mejlku na hospiz@caritas-oberlausitz.de přizjewić. Link k nadrobnym informacijam je pod www.posol.de wozjewjeny.